

滂喜齋藏書記

滂喜齋藏書記卷二

吳縣潘祖蔭

子部

元刻孔叢子七卷 一面四冊

宋咸注前後皆有咸序前序後接本文無日每半葉十二行行大二十三四字小二十七八九字不等附釋文敬徹字缺筆後有嘉祐八年呂逢刊書序此元人覆刻本也延令季氏藏書

附藏印

季振宜藏書記

明刻賈誼新書十卷 一面四冊

淳熙辛丑胡价跋云提學漕司給事程公暫攝潭事刻之學宮跋後又有題記云淳祐八年十月知院大

使陳公刊脩按常熟瞿氏歸安陸氏皆有明正德本
瞿氏志云潭板明時殘闕宏治閒陸桐爲長沙守脩
補印行陸氏志云陸本後歸吉府據此則宋時刊板
歷明尙存但遞有增修耳陸志又云吉府本冊首蓋
吉府圖書朱文方印陸本卷六第三葉十一十二
三行空白此本冊首無吉府印而卷六亦無空行則
在二本前明甚其元末明初之際乎同治辛未戴子
高校過卷末有其題字

宋刻說苑二十卷 一函十冊

前有劉向進書序序後接目錄目錄後曾鞏序每卷題
鴻嘉四年三月己亥護左都水使者光祿大夫臣劉
向上此卽東澗翁所謂古人經進書式也每半葉九
行行十八字此書以北宋二十二行本爲最古其次

卽此本也十九卷後有題字云歲壬申秋瑯山翁士
白重修校正二十卷後有題字三行斷爛重裝脫去
其半以士禮跋證之知咸淳乙丑九月鄉貢進士直
學胡達之際役迪功郎改差充鎮江府學教授徐忻
迪功郎特差充鎮江府學教授李士忱命工重刊卷
四立節篇有尾生殺身以成其信一句卷六復恩篇
多木門子高一條與堯翁所述悉合堯翁所見咸淳
刻有四本一顧抱冲家殘本一吳氏拜經樓本一濂
溪坊蔣氏本一西白塔巷蔣氏本此本舊爲大興朱
竹君學士所藏完好無闕今二十二行本不可見則
咸淳本卽宋本之甲矣可不寶諸

附藏印

大興朱氏竹君藏書之印 朱筠

元刻纂圖分門類題五臣注揚子法言十卷

四冊

前附新增麗澤編次揚子事實品題所采陸績述元班固漢書凡十餘家又附門類題目取篇中語分類排次凡五十門麗雜無序題永嘉先生陳傅良編疑依託也分類之後有題記二行云麻沙劉通判宅刻梓於仰高堂每半葉十行行大十九字小二十三字前有鼎元季雅印王元美舊藏也弇州藏書多有伯雅仲雅季雅印自明竺塢文氏及王雅宜皆經藏弄入國朝歸泰興季氏延令書目著錄法言五臣注十卷四冊卽此本也

附藏印

蘇公 鼎元 季雅

江左 竺塢 梅谿精舍 玉蘭堂 五峰樵客

辛夷館印 王印履吉

李因是珍藏印 季印振宜 滄葦 御史振宜之章

宋文侶印 鷺谿 膠西宋氏文侶珍藏圖書

雪广居士

劉氏維詰珍藏 劉氏家藏 敬一主人

邢江戴大章印 大章 堯聲

宋刻監本音注文巾子十卷 一函二冊

巾箱本前五卷題監本音注後五卷題纂圖音注前有世系年表河汾肄子王壬編其後裔也每半葉十三行行大小俱二十三字阮逸注下有注云逸建陽縣文瑞里人本朝王堯臣榜乙科本朝上空格宋諱衍夢字缺筆可知爲宋槧也舊爲插花山馬氏藏書

附藏印

宋本 甲 海昌馬思贊印 仲安一號漁邨

宋刻眞文忠公讀書記二十二卷 二函十二冊

西山讀書記舊分甲乙丙丁四集丙集久佚其餘三集刻本亦不同 四庫著錄本甲集三十七卷乙集二十二卷丁集六卷歸安陸氏藏開慶元年福州官本乙集十六卷丁集八卷余又見一宋本大學衍義其第一行題讀書記乙集上大學衍義第幾卷則衍義編在乙集之內其卷帙更多矣此本二十二卷不分甲乙首卷第二行題三山殿元邱聞之曾子肯校勘標注當是二人所重輯非其舊第每半葉十三行行二十三字遇宋諱恒貞等字缺筆舊藏故相明珠家前有謙牧堂藏書記

附藏印

謙牧堂藏書記 謙牧堂書畫記

宋刻諸儒鳴道集七十二卷

所采諸儒語錄自濂溪涑水以下凡十三家濂溪通書一卷涑水迂書一卷橫渠正蒙八卷經學理窟五卷語錄三卷二程語錄二十七卷上蔡語錄三卷元城語錄三卷劉先生譚錄一卷道護錄一卷江民表心性說一卷龜山語錄四卷安正忘筌集十卷崇安聖傳論二卷橫浦日新二卷後有精書題記云越有諸儒鳴道集最佳年久板腐字漫觀者病之迺命刊工刻畫填梓隨訂舊本鉅足其文令整楷焉時端平二禩八月吉日郡守閩川黃壯猷書每半葉十二行行廿一字內缺迂書一卷理窟第五一卷二程語錄

第八至十九卷皆鈔補明文淵閣官書其書函猶原庫裝也至今不蠹不脫觸手如新崑山徐氏舊藏

附藏印

崑山徐氏家藏

乾學之印

健庵

明刻司馬法直解

一冊

題前辛亥科進士太原劉寅解當是明初人也前有自序章疏句釋淺而易曉開引史事爲證 四庫未著錄怡府藏書

附藏印

明善堂覽書畫印記

安樂堂藏書記

日本鈔黃帝內經太素殘本二十三卷

廿二冊

題通直郎守太子文學臣楊上善奉勅撰注黃帝內經世所傳者惟唐王冰注此書自宋以來不聞著錄

此日本寫本攷唐書藝文志楊上善注黃帝內經明
堂類成十三卷又黃帝內經太素三十卷此本共存
卷二之三卷五之六卷八之十五卷十七卷十九之
二十卷二十三之三十凡二十三卷闕七卷所存卷
中亦有闕文脫簡前有長方朱印曰函碕文庫每卷
末有題字云仁安某年某月某日以同本書之以同
本移點校合了丹波賴基又一行云仁平某年某月
某日以家本移點比較了憲基或云相傳本
作久壽保元攷仁平久壽保元皆日本近衛王紀年
在宋紹興時仁安六條王紀年在宋乾道時當是憲
基從丹波寫本傳錄故仁平久壽保元之上皆旁注
本云二字本云者舊本有此一行也此本紙色尙新
當出近人手鈔每半葉七行字兼行草長短不齊中

無板心原書疑爲卷子本自唐以來沈埋于載醫林古笈海舶重來未可以殘帙近鈔而忽視之

元大德重校聖濟總錄殘本六卷

一百八冊

宋政和中奉敕撰原本二百卷重刻於金大定再刻於元大德此卽大德本也日本活字本卽從大德本出前有大德四年焦養直序謂江浙行省奉詔校刊四庫著錄乃程林纂要二十六卷非全書也此本僅存六卷

五十一 五十二 五十三 一百九十四 每半

葉八行行十七字疏行大字怡府藏書

附藏印

安樂堂藏書記

宋刻三因極一病證方十八卷

一百一十二冊

宋陳言無擇編前有言自序每半葉十三行行二十

三字此本卷一至九卷十四至十六精槧可愛餘六
卷麻沙本似元人覆刻蓋以二本合成者也武林高
氏長洲汪氏皆經收藏卷末二葉補鈔墨筆記云雍
正七年仲夏影述古堂珍藏宋本補全不知誰筆眉
端有以別本校其異同墨迹甚古當是明以前人筆
也

附藏印

弼口喬

步齋

茂書樓

默庵

奕葉書香

五

在卷第十
三之末

水月眞同

錫山余氏

二印在第十卷首
七印朱文甚古

以上

古杭瑞南高士深藏書記

武林高深甫妙賞樓

藏書

妙賞樓藏

高氏鑑定宋刻板書

五岳

眞形

汪士鍾印 藝芸主人 長洲汪駿昌藏 駿昌

雅庭 吳中汪四

元刻醫學啟源序三卷 三冊

金張元素潔古撰張吉甫序按序云劉守真病傷寒
潔古治之一服而愈與李漭醫史所言合其所著病
機氣宜保命集三卷 四庫著錄此書未收舊爲季
滄葦藏書卽載之延令書目者也

附藏印

季振宜藏書

簫樓印 鳳氏

元刻太醫張子和先生儒門事親三卷直言治病百
法二卷十形三療三卷 一面六冊

金張從正撰前有中統壬戌高鳴序時爲元世祖之

三年亦宋景定三年也黃薨圖藏金本後有撮要圖一卷三法六門方一卷世傳神效名方一卷治法雜論一卷又附扁華訣病機二種則以別一殘本補入此刻皆無之黃氏跋云殘本行款多同惟四圍雙線未能定其何刻今此本正雙線惟上下以墨塗之改爲單線當是作僞者以充金刻耳黃氏所見殘本必與此本同出一源也每半葉十三行行二十五字四庫著錄總名之曰儒門事親十五卷失其實矣雖以錢竹汀之博洽而補元史藝文志亦語焉未詳也舊爲朱笥河藏書

附藏印

笥河府君遺藏圖書 朱印錫庚

韓氏藏書 玉雨堂印

元刻殘本難經本義一卷 一冊

元許昌滑壽著四明呂復校正原書二卷此佚其下

卷前有至正中揭汝張翥劉仁本三序及壽自序按

絳雲樓書目注云壽明初人有危素序此本無危序

則與絳雲本不同刻或壽初刻於元時入明以後太

樸復序而刻之歟所引諸家有吳呂廣難經注楊玄操

難經注朱丁德用難經注虞庶難經注周與權難經注王宗

正難經注金紀天錫難經注張元素難經注元袁坤厚難經注

謝縉孫難經注陳瑞孫難經注今其書多佚得此猶存其

厓略本義之先有策考及圖十三曰經脈始從中焦

流注圖曰關格覆溢之圖曰藏府陰陽寒熱圖曰色

脈相勝相生圖曰五行子母相生圖曰男女生於寅

申圖曰榮衛清濁升降圖曰肝肺色象浮沈圖曰五

藏聲色臭味液之圖曰五邪舉心爲例圖曰七傳聞
藏圖曰手足陰陽榮分剛柔配運圖曰補水瀉火圖
怡府藏書

附藏印

明善堂覽書畫印記 怡府世寶 安樂堂藏書
記

高麗刻濟眾新編八卷 五本

高麗內閣刻本題內局首醫康命吉奉教撰前列引
用書目白靈樞至東醫寶鑑凡二十種李秉模序

附藏印

硯珊 龍門教諭

朱刻周髀算經 一函二冊

趙君卿注甄鸞重述唐李淳風等注釋附李籍音義

每半葉九行行十八字與九章孫子張邱建算經同
蓋同時刻也三經自傳是樓歸泰興季氏此本亦有
徐健庵印而季氏未經藏弄可見東海散出時其書
已析越二百餘年而後爲延津之合亦奇矣哉前有
君卿自序後有元豐六年九月祕書監校進諸臣銜
名又有嘉定六年括蒼鮑澣之仲祺序益南宋時以
元豐監本覆刊故字畫至爲精美云

附藏印

徐乾學印

健庵收藏圖書

傳是樓

黃金滿籩不如一經

宋刻孫子算經三卷張邱建算經三卷殘本九章算
經五卷 一面六冊

舊爲張古餘藏本卽百宋一廬賦注所云欲得不果

者也後有顧湖蘋跋云季滄葦書目算經四本卽此
第一本爲張邱建第二本爲孫子第三第四本爲九
章今九章三冊張邱建二冊已非原裝每半葉九行
行十八字楷墨清朗乃南宋槧之至精者千頃黃氏
汲古毛氏傳是徐氏石研泰氏皆經收藏

附藏印

陳道復印

宗伯

此疑爲錢牧齋印

黃虞稷印

季振宜印

滄葦

朱本

毛晉私印

子晉

海虞毛子晉圖書記

於溪

於溪艸堂

傳是樓

徐乾學印

健庵收藏圖書

陽城張氏省訓堂經籍記 張印敦仁 古餘珍

藏子孫永寶 薦采 葆采 葆采之印

秦伯敦父

廣圻審定

元刻圖繪寶鑑五卷補遺一卷 一面六冊

元夏文彥士良纂前有楊鐵崖序及至正乙巳自序
卷末有一行云至正丙午新刊是既成書之明年卽
上本也士良與陶南邨友南邨輟耕錄極稱其賞鑑
之精此書與書史會要亦各樹一幟者也王西莊韓
小亭皆有藏印

附藏印

善甫 龔大年印

眞適齋藏 眞適

王鳴盛印 西莊居士

韓氏藏書 玉雨堂印

明刻書史會要九卷補遺一卷 六冊

元陶宗儀撰曹睿序前附孫作所撰南村先生傳每卷後有助刻姓氏如宋人刻經之例卷一後云後山居士張氏瑞卿瑤命工鉅梓卷二後云三味軒主者張氏國祥麒助刊亦有數人合刻一卷者自明入國朝累經名人藏弄其中朱記曰文彭之印曰壽承氏者文氏三橋也曰文休承氏彭之兄嘉也曰沈與文印曰姑餘山人曰野竹家藏書明沈氏辨之也其所居在今杉瀆橋曰道復當爲陳道復卽畫苑所稱白陽山人也曰孫印從沾曰慶增氏卽著藏書紀要者也雖明刊可不寶諸

元刻白虎通義二卷 一函二冊

海甯吳槎客藏本盧東里所稱北宋槧者也然細審其字形紙色實爲元刻黃蕘圃瞿子雍嘗辨之矣蕘圃藏本得自汲古毛氏今歸瞿敬之卽子雍之後也此本後有抱經跋云目錄前小序白虎建德論開卷已訛然余取其書字字比對始知此本尙多古字而近世本率多改易又云此本雖分上下兩卷然篇目上作圓圍者十仍不失十卷之舊後得元大德年本明傅氏程氏吳氏何氏本皆不及此本洵乎舊本之可貴也抱經精於校勘其言如此

附藏印

秀水朱氏潛采堂圖書 文昭借觀 拜經樓

嘉興新豐鄉人唐翰題收藏印 新豐鄉人庚申

以後所聚

元刻風俗通義十卷 一函四冊

大德丁未劉平父刻於錫山學宮前有李果序後有
宋嘉定十三年東徐丁黼跋從黼本也明爲天籟
閣藏書 國朝入潛采朱氏拜經吳氏後有吳壽暘
補錄謝居仁跋卽以綠筆記其後云抱經堂元刻本
有此跋載羣書拾補因據以鈔入首序李晦此本作
李果觀跋中顯翁晦來訪云云則作晦者是也唐鑑
掩辨之云李君名果字顯翁或取碩果僅存之義未
可以顯晦對舉疑之按常熟瞿氏藏大德本亦作李
果則自以果字爲是果序題太中大夫行都水監而
謝居仁跋謂有耆儒李顯翁晦來訪耆儒不當以稱
顯官且述晦之言曰劉平父世常來守吾邦某之子

元昭錄吳泮則晦實吳人士非官斯土者也李果李晦自二人耳羣書拾補偶然刻誤吳唐之言皆非也附藏印

橋李頊藥師藏

秀水朱氏潛采堂圖書

拜經樓 吳兔牀書籍印

質肅公孫翰題印長壽 新豐鄉人庚申以後所聚

宋刻顏氏家訓七卷收證一卷 一函三冊

淳熙七年沈揆刻於台州揆紹熙中曾守吾郡每半葉十二行行十八字收證之後有校刊姓氏九行曰鄉貢進士州學正林憲曰迪功郎司戶參軍趙善德曰從事郎特添差軍事推官錢慶祖曰從事郎軍事

推官王構曰承直郎軍事判官崔嵩曰迪功郎州學
教授史昌祖曰承議郎添差通判軍州事樓鑰曰朝
請郎通判軍州事管銳曰朝奉郎權知台州軍州事
沈揆前有無名氏序後有揆序其所據之木有閩本
有蜀本有謝景思校五代和凝本顏氏家訓世所有
者當以此爲第一本 四庫本分上下二卷非舊第
矣錢氏讀書敏求記稱爲至寶然亦祇鈔本耳此本
元爲共山書院藏書 國朝何昞瞻孫伯淵皆經收
藏義門覆舟黃流平津過南陽湖亦遭陽侯之虐此
書兩度水厄而巍然尙在豈非鬼神呵護耶前序後
有木圖記云廉臺田家印如琴式甚古雅他刻所未
見也

此書爲沈虞卿所刊周益公以殫見洽聞與尤延

之並稱之本汲古閣舊藏後歸北客康熙甲午余復以厚直購而獲焉與尤氏校刊山海經可爲亞匹虞卿紹熙中嘗以中大夫祕閣修撰知吾郡見范志牧守題名云義門野士何焯書 虞卿自號欣遇見楊廷秀朝天集

此卽宋嘉興沈揆本錢曾但得其鈔本錄入讀書敏求記 四庫書載明刻二卷本當時求宋本未得也前代列此書於儒家 國朝因其歸心等篇不出當時好佛之習退之雜家衡鑒之公上符

容斷惜纂書時未進此本他時擬彙以上呈謹記於後孫星衍

過南陽湖舟覆載書數十簞俱沈溼但如此本願千里告予何義門家藏書亦皆沈水者此有義門

跋蓋兩經水厄矣敘文不知何人所作近有仿宋刊本款式悉相同惟版較小亦精本也星衍又記於金陵五松書屋時庚申年八月

庚申九秋白隄錢聽默鬻書自金陵歸攜得宋刻顏氏家訓二冊持以示余曰此書得諸五松園主人然其中有一段公案有非吾不能知者試爲君言之蓋此書向藏何義門家爲吾先人買出以歸於山東某氏後幾年而吾弟與友人貿易山東某氏出所藏書畫法帖并此書屬爲品評吾弟素知其爲佳本擬購歸而未之許今適見諸五松園詢主人所由來云是官於山東時爲友人所遺主人因此書遭水溼託爲裝潢而吾遂以他書易得且稔知君之有宋癖也遇書必求祖本吾與君交有

年矣從未有以宋刻奉覽者故借此一本以爲所見古書錄備甲編之日可乎余固重其爲宋刻而書之精靈亦若有戀戀於吾郡者爰出舊鈔影寫本相易而益以斤金命工重爲整理工成之日不可不著其緣起而余遂重有感焉思吾郡藏書之富無過常熟毛錢二家毛氏汲古閣珍藏祕本書目及錢遵王讀書敏求記所載皆云鈔本並未見有宋刻乃義門以爲汲古舊藏當非無據顧其中遷徙靡常轉展以歸於吾郡此書之歸宿果有定耶抑無定耶造物之巧何如是耶至於收藏之所自元以來班班可考書分三冊於每冊卷首及尾皆有省齋二字共山書院四字圖書雖省齋不知誰何而共山書院則元代也近嘉定錢竹汀先生

補元史藝文志載有其山書院藏書目錄此卽所藏之書可知每冊首尾紙背有一長方鈐記其文云國子監崇文閣官書借讀者必須愛護損壞闕失典掌者不許收受皆楷書朱記始猶不甚明析旣而思何小山校本經典釋文於左氏春秋音義末卷模有是印其文正同且識云印長二指四寸五分闊不一指一寸六分今取證是印悉悉相合可知是書源流其未至汲古閣以前已在北地收藏有年矣義門但知此書爲舊刻而於紙背印記未經指出此可發前人所未發故并誌之書於宋諱注云某諱而沒其文至於愼敬等字並未缺筆影鈔本一一缺之遇宋刻誤字悉照校本改去非其舊矣鮑氏叢書雖用述古堂影宋本重雕然其

行款已改爲每葉十八行每行之字卽仍其數以宋刻統排葉數數之難復舊觀矣祖本之可貴無過於此余於翰墨因緣何若是之深耶特不知南而北北而南書之於吾郡果以爲虞卿所守之地能戀戀不去耶嘉慶五年冬十一月小寒後二日炙研書於聯吟西館之南窗堯圃黃丕烈識

辛酉中秋後一日兒子玉堂從郡廟前骨董鋪中收得古銅印一方其文曰共山書院雖非此本所印之舊然其爲地則同因附鈐於此以誌巧合小春四日堯圃記

此淳熙台州公庫本卷中於構字注太上御名而闕其文以其時光堯尙在德壽宮也前序末有長記廉臺田家印五字攷元制各道置廉訪司爲行

臺所屬廉臺之名實昉於此此本蓋宋槧而元印者其閒必有修改之葉故於宋諱閒有不避耳辛酉十有一月竹汀居士錢大昕借讀畢記之附藏印

省齋 其山書院

同愛堂劉氏珍藏圖書記 劉口 琢亭

孫氏伯淵 糧驛守巡鹽五官之印 臣星衍

嘉石軒藏書記

汪 文琛 憲奎 秋浦 平江汪憲奎秋浦印

記 汪印士鍾 民部尙書郎

宋刻東觀餘論二卷 一函四冊

宋黃長睿撰明眞賞齋華氏天籟閣項氏皆經收藏項氏有仿宋本卽從此本出也後有豐人叔跋云右

東觀餘論宋刻初搨紙墨獨精卷帙甚備世所罕見
嘉靖己酉六月癸亥道生觀於東沙華氏眞賞齋又
項子京跋云隆慶二年冬日仲兄少溪官居南都公
務之暇惟以書史娛目賞心得此善本持以見示知
余所好授之襲藏永俾無斁墨林項元汴記皆手蹟
在末一葉可寶也又有武林惠兆壬看款兆壬字秋
韶工書法此函籤卽其所題也又按是書紹興丁卯
其子訥初刻於建安漕司有跋又有嘉定 年樓鑰
跋云著作莊子禮欲得善本傳後再爲詳校而寄之
其後有莊復敬跋脫去前葉僅存莊復敬書於籌思
堂八字跋後有題記謂刊於庚午之秋明年正月得
公書又校示一百五十五條云云庚午實嘉定三年
則是建安一刻莊氏再刻所謂公書卽是攻媿書也

此爲覆刻本訛跋稱十卷而此本祇上下二卷然上卷中法帖刊誤又自分上下卷則非闕佚當是莊氏有所合并耳 四庫著錄本三卷伯思有校定杜子美集二十二卷楚詞十卷及汲冢師春書皆經刊板亦見訛跋楚詞杜集猶多他刻師春則絕無僅有矣不知天壤閒猶有流傳否

附藏印

宋本 竺塢 江左 玉蘭堂 梅谿精舍 辛夷館印 翠竹齋 鐵研齋 五峰樵客 放情山水之閒

王印履吉

項元汴印 墨林祕玩 墨林子 天籟閣 項氏萬卷堂圖籍印 子京父印 項墨林父祕笈

之印

季印振宜 滄葦 御史振宜之章

乾學 徐健庵

惠印兆壬 秋韶

韓氏藏書 金石錄十卷人家 韓印泰華 小

亭

宋刻夢溪筆談二十六卷

六冊

宋沈括撰 四庫著錄有補二卷續一卷此刻無之
舊本別行非缺佚也每葉二十四行行十八字後有
湯修年刊書跋云廣陵周侯開藩之二年慨然謂學
宮禮義之本因其舊而新之又斥其餘刊沈公筆談
爲養士亡窮之利此書公庫舊有之往往貿易以充
郡帑不及學校今茲及是益見薄於已而厚於士賢

前人遠矣乾道二年六月日左迪功郎充揚州州學教授湯修年跋據此是宋時揚州已有兩刻一爲公庫本一卽此郡學本宋諱玄匡胤貞字相楷慎驚鏡瑯皆缺筆第七卷首葉板心有泰定元年補刊六字蓋朱刻元修元印本也每冊之首有九芝八桂之堂整書祕閣森玉樓主人印諸朱記

朱刻夢溪筆談二十六卷

一兩六冊

乾道二年揚州學舍刻與前本同惟第七卷首葉板心無泰定補刊字當是印稍前耳成邸藏書有其題記云此書訛外甚多或非乾道原刊本也嘉慶癸酉春成親王重校記卷中眉端亦有王校語多引錢竹汀說

附藏印

成親王 皇十一子 諡晉齋印

楊紹和讀過 東郡楊紹和觀

宋刻仕學軌範四十卷 十冊

宋張鑑編有鑑自序首爲學次行已次莅官次陰德而以作文作詩終焉所采宋人書百種百刻其目卷末有元人題云大德五年浙東儒學提舉仲珩所遺藏之清晏閣筆跡秀拔惜其姓名已佚脫前有錫山鄒永章家藏書畫印松石主人蠡齋書屋泰峰所藏善本泰峰手校諸朱記

宋刻白警編殘本

宋趙善瑒撰端平元年刊於九江郡齋此猶宋刻宋印疏行大字楮墨皆精原書不分卷明宏治嘉靖覆刻析爲九卷卽 四庫著錄本也提要云八類五十

五子曰此本僅存事君政事兩類事君類分子目六
曰忠義曰公正曰德望曰得體曰講讀曰諫諍板心
刻自警編丙四字政事類分子目八曰政事曰鎮靜
曰信曰通下情曰濟人憂民附曰救荒曰救弊曰辨
誣板心刻自警編戊四字然則是書以十千之前八
字分類此爲第三第五類也提要又云原本各注所
引書名今多佚脫無從校補按是本爲第一祖刻而
各條出處亦不盡有則其例本不畫一非脫佚也書
賈作僞改爲二卷卽於首行自警編下添刻上下字
樣以充全帙舊有善琰二序前一序有廣教育攝養
好生使命數門云云此本無之遂抽去以掩其迹而
後一序尙存每半葉十行行二十字

附藏印

亞聖公六十二世之孫保鶴岡印 玉洞書

宋刻雲齋廣錄八卷後集一卷 一函二冊

宋廩延李獻民彥文撰卷一士林清話卷二卷三詩話錄卷四靈怪新說卷五卷六麗情新說卷七奇異新說卷八神仙新說後集則盈盈傳及歌詩一首也前有政和辛卯獻民自序每卷冠以新雕二字蓋猶政和間刊本其書荒誕不經分門亦近瑣碎然四庫未收各家書目亦不著錄北宋孤本流傳至今亦說部中之祕帙也每半葉十五行行廿五字萬卷樓兩印朱文甚古疑爲豐人翁藏書忠義下一字微蝕右首从邑尙可辨疑當爲鄧豐之受姓所由始也後歸王履吉 國朝入泰興季氏漢陽葉氏

附藏印

□氏萬卷樓藏書記 世爲忠義(□氏

江左 王印履吉 鐵研齋

季印振宜 滄葦

漢陽葉名澧潤臣甫印 葉名澧

元刻南村輟耕錄三十卷 十六冊

元陶宗儀撰前有青溪野史邵亨貞募刻疏按亨貞字復孺有野處編四卷 四庫著錄又著蟻術詩選八卷蟻術詞選四卷見擘經室外集此書沁園春二闋卽其筆也其人與南村同時則猶爲元刻有毛氏子晉朱記津逮刊本當卽從此本出也亦爲士禮居藏書

附藏印

毛氏子晉 黃丕烈印

宋刻殘本翻譯名義二卷 四冊

題姑蘇景德寺普潤大師法雲編僅存第一第二兩
卷前有紹興丁丑一序而脫去首葉證以支那本知
爲周敦義序也板心有開經人名字皆斷爛其可辨
者有云僧法願施印經本錢開葉慧承札看心經信
人錢開張浩答四恩三有一卷馬珪開報四恩二卷僅三
四葉耳第一卷後題宋太尉宅施錢十四貫足助開
此集增添福慧東掖白蓮教院住持與咸喜遇翻譯
名義回施五貫助集流通開元寺都僧正普照大師
智燈施錢開集二版比丘淨行口遂各開一版並用
莊嚴淨土比丘祖輝等同施蓮華淨社剩十七貫足
助開此集傳法寺比丘尼彥楷施五貫足常熟縣明
淨庵淨人蘇彥億募錢十二貫足各隨施主願心如

意第二卷後題平江府甯國寺西面南居住弟子沈
貴□□□□梵懃各施錢五貫文足下佚

宋刻雲門匡眞禪師廣錄三卷

眞門人守堅集首列熙甯丙辰權發遣兩浙轉運副
使公事蘇辦序上卷對機三百二十則中卷室中語
要一百八十五則垂示代語二百九十則下卷勘辨
一百六十五則游方語錄三十一則遺表遺誠及雷
岳行錄何希範請疏終焉末附門人緣密述頌八首
校勘者福州鼓山宗演雷錄云師諱文偃姓張氏蘇
州嘉興人以乾和七年己酉四月十日順寂何疏云
師歸寂後十七載感夢於雄武軍節度推官阮紹莊
云自南漢乾和七年己酉閱十七載當爲宋乾德三
年乙丑而瞿汝稷指月錄云乾和七年四月十日示

寂追乾德元年雄武軍節度阮紹莊夢師蓋十七年
矣是瞿用疏語而誤計三年爲元年也每半葉十一
行行二十字首葉有欽差處置邊務關防季振宜藏
書朱記

宋刻琅邪白雲二禪師語錄三冊

首列小傳二則琅邪名慧覺西洛人姓氏不載臨濟
第七世白雲名法演卽五祖演緇州人姓鄧氏臨濟
第十世琅邪中後四錄門人元聚用孫法宗編集序
卽用孫撰白雲語錄有紹聖三年左宣德郎知台州
黃巖縣事張景脩序其初住四面山錄參學才良編
次住太平錄參學清遠集次住海會錄參學景淳集
其海會後錄參學智宣集有紹聖二年宣德郎新差
知蘄州蘄水縣事兼兵馬監押武騎尉河間劉跂揚

州錄事參軍吳郡朱元符二序末附偈頌四十一首
每半葉十二行行二十字其黃梅東山語錄門人惟
慶編後載偈頌三十三首第二十一首爲重會郭功
甫云淨空居士久相知三十年來只片時功甫名祥
正宋史文苑有傳五燈嚴統提刑郭祥正字功甫號
淨空居士崇甯初到五祖命祖陞座公趨前拈香云
云卽是錄中郭朝奉祥正請上堂朝奉於法座前燒
香云云也每半葉十一行行二十字末有記云依雲
居本續添東山錄慶元庚申正月上日識故行款不
同有欽差處置邊務關防御史之章季振宜印滄葦
諸朱記

宋刻殘本法華大愚雲峰楊岐道吾五禪師語錄二

每半葉十二行行二十字首列小傳五則法華名齊
舉一名全舉道吾名悟真鄉貫姓氏俱不載大愚名
守芝太原人姓王氏雲峰名文悅南昌人姓徐氏楊
歧名文會袁州人姓冷氏皆臨濟宗法華大愚第七
世雲峰以下均第八世雲峰語錄已闕楊歧語錄嗣
法小師仁勇編有皇祐二年湘中苾蒨文政元祐三
年無爲子楊傑二序

宋刻寶峰雲庵眞淨禪師語錄三卷

門人福深錄上卷住筠州洞山金陵時語中卷住廬
山寶峰時語下卷爲偈頌前有元豐八年王安石王
安禮請疏二首及眉山蘇轍序後有崇甯元年鄱陽
任軒程袞後序指月錄寶峰克文禪師陝府鄭氏子
坐夏大瀉問僧舉雲門語有省往見黃龍不契後見

順和尚方知黃龍用處遂回見黃龍此卽蘇序所謂
得法於黃龍南公者也師卒於崇寧元年十月十六
日年七十八程序作於是年季春望日蓋編是錄時
師猶未示寂也故無行錄塔銘每半葉十一行行二
十字有季振宜藏書朱記

宋刻智門光祚禪師語錄一冊

每半葉十一行行二十字門人重顯序云師韶陽的
孫香林嗣子是爲雲門再傳弟子序末但云辛未歲
蕤賓月之五日指月錄雪竇重顯禪師遂甯府李氏
子示寂於皇祐四年壬辰年七十三則是序作於仁
宗天聖九年五月五日也

宋刻南院首山葉縣神鼎承天石門六禪師語錄三

冊

每半葉十二行行二十一字至二十四不等首列小傳六則南院名慧昭承天名智嵩鄉貫姓氏俱不載神鼎名洪謹襄水人姓氏不載首山名省念萊州人姓狄氏葉縣名歸省冀州人姓賈氏石門名蘊聰南海人姓張氏皆臨濟宗南院第三世首山第五世葉縣以下均第六世石門語錄有光溥序云編成二卷集號鳳巖故首行題鳳巖集與他卷題語要語錄者不同中有季振宜藏書朱記

宋刻東林和尚雲門庵主頌古一冊

侍者悟本錄首有紹興癸丑呂本中序云予嘗以爲趙州說禪如項羽用兵直行徑前無復轍迹所當者破所摧者服雲門杲公以予爲知言杲公旣與東林珪公判斷古人公案得一百一十篇已成編矣縱橫

自在氣蓋諸方蓋得趙州宗旨後之觀斯文而悟斯理則必復以予言爲然每半葉十一行行二十字

宋刻殘本妙湛和尚偈頌一卷

二冊

題侍者擇朋顯潤錄中有與陳了翁詩則南渡前僧也板心有頌五二字卷末有心空跋全書當祇五卷而此爲最後一卷也心空跋云興化軍莆田縣信女方口氏十六捨財二百貫足福州閩縣信士鄭璵與室郭氏錢貳百貫文同刊妙湛和尚語錄口口口餘資添助印施普願見聞發明心地同證菩提紹興壬戌冬至日校對比邱心空題語錄下脫三字當是記卷數爲書估剗去以掩殘缺之迹每葉二十行行十八字舊藏雲閒莫氏卷尾題字云莫雲卿氏城南精舍藏書又云辛巳夏日卽佐卿觀於廷韓石秀齋

中孫榮鄔憲同觀又云辛巳秋日盛伯靈邦承徐文卿珍同觀又云甲申夏日觀李待問前後有海印居士鹿墅含玄子眉公單恂捐庵諸朱記按含玄子趙凡夫之父也著有含玄子詩說及含玄子十六卷別編十六卷含玄集四卷別集二十卷見蘇州府志藝文類又單恂字侑庵庚辰進士李待問字存我癸未進士明季鼎革時殉國難並見靜志居詩話

元刻至元辨僞錄五卷

題大都路道者山大雲峰禪寺沙門祥邁奉勅實錄撰前有張伯淳及邁白序其大旨因道家排斥佛教故作書辨之蠻觸交爭楚國失矣齊亦未爲得也前有錢智之印邁王季振宜藏書朱記延令書目著錄又按祥邁序有云使大羅玉帝魂驚於九天之中元

始天尊膽落於三清之上萬天教主羞赧難伸九府
洞仙慚惶無地則其書鄙俗本無可取但自古二氏
交爭如道笑錄之類頗傳於世此本希見錄而存之
宋刻纂圖釋文重言互注老子四卷 一面一冊

河上公注前二卷爲道經後二卷爲德經前有序題
太極左仙公葛玄造舊爲嘉興唐鵠庵藏書莫子偲
跋其後云同治己巳九秋邵亭長借錄一過可校正
明世德堂本之誤百許字眞可寶也序每半葉十二
行行二十字經注每半葉十三行行大小均二十三
字即勁缺筆板式與文中子同邵亭以爲元刊六子
本也

附藏印

宋本 方鑾時鳴私印 方大治際明父

翰題印

莫友芝圖書記

元刻列子八卷 二冊

晉張湛注唐殷敬順釋文前列湛序序後目目後劉向序聯接不分猶存古書舊式日後有注云天寶初題曰沖虛真經大宋景德四年勅加至德二字則其書猶從宋本出舊爲延令季氏愛日精廬張氏藏書見莫子偁經眼錄

附藏印

季印振宜 滄葦 廣鈞平子 吾生甲申 愛

日精廬

滂喜齋藏書記卷二終

滂喜齋藏書記卷三

吳縣潘祖蔭

集部

宋刻楚詞後語六卷 二冊

宋朱子作楚詞集注又以晁補之所輯續楚詞二十卷變離騷二十卷刪定五十二篇爲後語自爲之序序在日後每半葉十一行行二十四字舊時必附集注並行又有辨證二卷此其佚存者耳怡府藏書通體朱筆句讀頗多誤

附藏印

安樂堂藏書記 明善堂覽書畫印記

叔正 同消萬古愁

明刻蔡中郎集十卷 四冊

宋天聖中歐靜編廬抱經所謂最古本也此書明有華堅活字本徐子器本此本日後題字云正德乙亥錫山蘭雪堂華堅允剛活字印行今鄭氏得之重刻是卽從活字本出楮墨古雅當在明中葉時前後皆有墨圖記當是刊刻年月惜爲人剗去以充宋刻日後題字則去之未盡也華刻板心下有蘭雪堂三字此刻黑口一望而知楊氏校刻此集所據明刻凡本亦未見此刻則雖後於蘭雪亦以稀見珍矣

附藏印

方印楸和

北宋刻杜工部集二十卷

一百十冊

題前劍南節度參謀宣義郎檢校尚書工部員外郎賜緋魚袋京兆杜甫每卷先列其目日後接詩前有

王原叔記嘉祐四年蘇州郡守王琪刻本也浣花全集當以此爲最古其餘槧本不下數十家皆雲祕矣祕帙流傳海內恐無第二本能不視爲鴻寶耶王琪後記有近質者下注云如麻鞋見天子垢膩脚不襪之句凡十三字今本皆脫每半葉十行行二十字宋諱缺筆甚嚴舊爲汲古閣藏書宋刻存者卷一首三葉卷十之十二卷十七至末共七卷餘皆影鈔結構精嚴毫髮不苟斧季之甥王爲玉筆也後有斧季手跋王琪之琪誤作祺

先君昔年以一編授展曰此杜工部集乃王原叔涑本也余借得宋板命蒼頭劉臣影寫之其筆雖不工然從宋本鈔出者今世行杜集不可以計數要必以此本爲祖也汝其識之展受書而退開卷

細讀原叔記云甫集初六十卷今祕府舊藏通人家所有稱大小集者人自編摭非當時第次乃搜哀中外書九十九卷古本一卷蜀本二十卷集略光憲序二十卷鄭文寶序十五卷樊晃序小集六卷孫卷別題小集二卷孫僅一卷雜編三卷除其重複定取一千四百有五篇凡古詩三百九十九起太平時終湖南所作視居行之次若歲時爲先後分十八卷又別錄賦筆雜著二十九篇爲二卷合二十卷寶元二年十月記二十卷末有嘉祐四年四月望日姑蘇郡守王祺後記此後又有補遺六葉其東西兩川說僅存六行而缺其後而第十九卷缺首二葉展方知先君所借宋本乃王郡守鏤版於姑蘇郡齋者深可寶也謹什襲而藏之後廿餘年吳興賈人持宋刻殘本三冊來售第一卷僅存首

三葉十九卷亦缺二葉補遺東西兩川說亦止存
六行其行數字數悉同乃卽先君當年所借原本
也不覺悲喜交集急購得之但不得善書者成此
美事且柰何又廿餘年有甥王爲王者教導其影
宋甚精覓舊紙從鈔本影寫而足成之嗟乎先君
當年之授此書也豈意後日原本之復來展之受
此書也豈料今日原本復入余舍設使書買歸於
他室終作敝屣之棄爾縱歸於余而無先君當年
所授不過等閒殘帙視之爾焉能悉其源委哉應
是先君有靈不使入他人之手也鈔畢記其顛末
如此歲在己卯重九日隱湖毛辰謹識時年六十
朱刻昌黎先生集四十卷外集十卷 一函六冊
百宋一塵賦注云小字本昌黎集每半葉十一行行

廿字字畫方勁而未有注當是北宋槧此本行款與
堯圃所言一一脗合惟後有影寫紹興己未劉昉序
一葉序云潮州公舊治大觀初先大夫嘗集京浙閩
蜀刊本及趙德舊本參以石刻訂正之郡以公廟香
火錢刊行中經兵火遂無孑遺今訪得舊本重刊序
後又有木圖記云淳熙改元錦谿張監稅宅善本以
此證之小字本一刊於大觀再刊於紹興三刊於淳
熙此刻精勁拔俗疑爲大觀祖本末後一葉從別本
影鈔耳不得執此以難堯圃也堯圃所藏僅前十卷
此惟有五卷影寫餘皆宋刻可以傲士禮矣舊爲朱
簡河藏書

附藏印

元父印 九邨 淳

笥河府君遺藏書記 朱印錫庚 少河 椒花

吟觴

宋刻殘本白氏文集十七卷 二百十冊

白氏文集以北宋廬山本爲最古絳雲一炬種子斷絕矣此南宋殘本有宋景濂藏書印卽見於敏求記者然與遵王所記頗有牴牾記云十三之十六二十六之三十三十三之三十八共十七卷據其所列祇有十五卷耳不當云十七卷已可疑矣此本前九卷同三十卷後有三十一三十二兩卷而無三十五至三十八四卷有五十五之五十八四卷此更可疑者也蕤圃不能破此疑案以爲遵王之誤不知敏求記當時藏書家祇爲鴻寶輟轉傳鈔不無譌奪豈遵王之誤哉舊爲顧五癡藏書嘉慶丙辰五癡之子南雅

通政以歸薨圖雖殘珪斷壁彌可寶貴薨圖據卷端
燒痕亦欲歸之絳雲燼餘則蛇足矣遵王又有一宋
刻全本歸太倉王奉常者今在常熟瞿氏此本每半
葉十一行行二十一二十二字不等墨藏本每半葉
十三行行二十二至二十五字不等行款不同

東城顧五癡家藏書甚富余嘗購得數十種矣主人知余好之篤雖一鱗片甲亦自侈爲奇寶因出破書一束指示余曰此絳雲餘燼也曷歸之余聞卷知是宋刻白氏文集每卷首末皆有金華宋氏景濂圖記爰憶讀書敏求記中曾言之未知卽是此書否然窺主人意頗祕之未便假歸歸家檢道王所記十三之十六二十六之三十三之三十八共十七卷是金華宋氏景濂所藏小宋板圖記宛然乃知是書卽述古堂中物情五癡族然古否可愛

姪開之往核卷數并問其直後開之來云是十七卷余喜甚而索直逾百金余又以不能卽得爲憂越歲丙辰五癡以老病終厥子南雅昆季皆兢兢焉守其父書而南雅與余交亦頗投契每一過訪必以是書爲請遂與元刻伯生詩續編以白金二十兩易得命工重加裝潢所以存舊物也顧其書有疑義待析者遵王云廬山本爲庚寅所炬而此集卷中燒痕尙在有一葉中不過數字者知絳雲餘燼之說未必無據餘卷皆散而二十六之三十獨完好勝於餘卷尙是舊時裝潢通冊又似經水淫者未知天下奇書何其厄於水火之甚耶至於十七卷中遵王所記又與今所見不同十三之十六二十六之三十合於遵王所記者也三十三三

十四卷之前有三十一三十二後無三十五三十六三十七三十八而有五十五五十六五十七五十八不盡合於遵王所記者也此或係遵王筆誤而古書之傳信於後綦難矣余向得蘭雪堂活字本白氏文集敘次亦與宋刻合惜小注多缺本文亦有訛脫擬爲校錄副本聞顧竹君家有宋本白氏長慶集此或廬山真面目矣然則庚寅一炬受厄者果白氏長慶集乎抑白氏文集乎倘得一見之以釋其疑不亦快乎但未知其書果在否也大清嘉慶二年丁巳四月己卯日立夏甕圃黃丕烈識

是書裝潢時適錢竹汀壻瞿莪生來莪生爲目錄之學者見古書必爲討厥源流爰取是書展閱并

及拙跋見遵王所記卷數悉數之曰君所得逾於遵王矣余曰否蓋猶是十七卷也葢生曰十三之十六二十六之三十三三十三之三十八不過十五卷而君今所得十三之十六二十六之三十三同於遵王三十五之三十八爲五十五之五十八所誤亦未可知其三十一三十二兩卷遵王所未見者也互計之遵王所記者十三十四十五十六卷二十六二十七二十八二十九三十卷三十三三十四三十五三十六三十七三十八卷君所得者十三十四十五十六卷二十六二十七二十八二十九三十卷五十五卷五十六卷五十七卷五十八卷豈非今多於昔乎余亦無辭以對因思遵王未知其誤而偶誤於前余欲

正其誤而仍誤於後天下事之一誤再誤而尙有
待於旁人之繩糾者比比皆是也爰誌養生之語
兼以自訟云爾墓圖又識

余收得白氏文集在春夏之交以殘闕不完之物
而悶藏在塵封蝨蝕中已歷有年所至今始得發
而讀之或亦公之精靈有以呵護之也近日陳東
浦方伯建藩蘇郡訪求唐宋先賢遺跡慨然於公
之未有專祠因從虎邱買得蔣氏故園園爲國初
顧云美塔
影園鳩工庀材葺而新之以祀白公又於其旁添
故址立懷杜閣移建仰蘇樓以祀少陵東坡焉余思白
公在蘇遺愛至今稱之有云白公隄者茲又特立
專祠俾廣大教化常被中吳矣新祠落成之日適
是集裝潢竣事殆氣機之感召使然耶爰誌其事

於卷末以告後之覽者中秋前六日夕時剪燭書
書魔

嘉慶癸亥夏六月十有二日輯百宋一廬書目重
展於縣橋之新居堯翁

附藏印

金華宋氏景濂

二泉邵寶

南陽彥智

長印朱文甚舊

丕烈私印

堯圃

無雙

汪士鍾藏

汪印振勳

某泉

朱刻乖崖集十二卷附集一卷

四冊

晁公武讀書志著錄十卷陳直齋曰近時郭森卿宰
崇陽刻此集并語錄爲十二卷此卽森卿刻本前有

其序後附項平叔北峰亭記題嘉定三年九月則嘉定以後刻也黃蕤圃藏本咸淳乙巳左縣伊賡刻卽出郭本百宋一塵賦所謂設乖厓於崇陽者也其書僅有六卷卷七至末皆賜書樓舊鈔此本既爲祖本且首尾完好槧印精美誠足駕士禮而上之每半葉九行行十八字黃本每半葉十二行行廿字蓋覆刻時行款亦改易矣畢秋帆董蔗林兩尙書皆有藏印附藏印

沈士林 沈巽 東陽子 顧汝修印

蔗林藏書 秋騷

身樣

胡盧

弟孫氏

元刻范文正公集二十卷別集四卷 一函四冊

宋范仲淹撰八世孫文英刻前有蘇軾序序後有墨

圖記云天厯戊辰改元褒賢世家重刻於家塾歲寒
堂按公集宋乾道丁亥鄱陽守俞翊刻於郡齋淳熙
丙午郡從事北海綦煥補刊此本卽自鄱陽本出後
有俞綦二跋俞跋前有闕葉僅存末二行歲月姓名
猶可認也綦跋之後題字三行云嘉定壬申仲夏重
修朝奉郎通判饒州軍州兼管內勸農營田事宋鈞
朝請大夫知饒州軍州兼管內勸農營田事趙口楫
舊尙有文英跋此脫之每半葉十二行行二十字舊
怡府藏書也

附藏印

安樂堂藏書記 研樵眼福

元刻殘本范文正公集十一卷別集一卷尺牘三卷
政府奏議二卷 十四冊

亦歲寒堂刻印本差後文集存卷一卷四卷五卷九
至十六凡十一卷別集存第四一卷元時陸續附刊
尙有補編五卷及尺牘奏議等十三種此本補編闕
餘存奏議二卷尺牘三卷及言行拾遺西夏堡寨洛
陽遺跡白山遺跡吳中遺跡郡陽遺跡贊頌論碑銘
褒賢祠記凡十種祠記祇第二一卷亦不全矣尺牘
宋淳熙三年張栻刻於桂林郡齋南軒及朱文公均
有跋元至元再元丁丑文英重刻其跋云先公尺牘
舊刊郡庠今梓家塾所謂郡庠者自是蘇州郡庠是
桂林一刻吳中再刻凡三刻矣奏議刻於元統二年
甲戌據文英跋則公奏議有二本一十七卷韓魏公
序一二卷卽此本也又天厯三年八世孫國僞跋謂
有年譜與文集奏議並行此本無年譜蓋亦脫之卷

首有長洲顧仁效水東館收藏圖籍私印

明刻文潞公集四十卷 一函四冊

宋文彥博撰明嘉靖五年高陵呂柟刻舊有柟序及
石林葉氏序略此本脫去柟序前有趙琦美印後有
楷書鈐記云吳郡何慈公娛野園珍藏書籍蓋由脈
望館歸於何氏卷末有慈公手跋云崇禎庚午吳君
平以是集求售此故內兄立度物也亟收之入宋文
集部慈公記每冊之後皆題文潞公集第幾本計若
千葉常熟瞿氏亦有一本以胡心耘鈔本校呂柟序
未佚

舊刻殘本鐫津集二卷

宋藤州鐫津東山沙門契嵩撰原本二十二卷存首
二卷板寬一尺四五寸疏行大字卽非宋刻亦明槧

之出於宋刻者也前有行業記尙書屯田員外郎陳
舜俞撰稱其所著有禪宗定祖圖傳法正宗記嘉祐
集治平集契師化於熙甯五年與老泉同時又與韓
魏公蔡君謨游乃其集亦名嘉祐豈獨不識明允耶
宋刻王注分類東坡詩二十卷

四函十九冊

舊題王十朋注實依託也前有自序及趙夔序以二
殘本合成自第一至四卷第六至十六卷爲一本每
半葉十一行行大十九字小廿五字自卷第十七至
二十卷爲一本每半葉十二行行大廿一字小廿六
字廬陵須溪劉辰翁批點序目一卷亦劉批本也按
是書 四庫著錄者三十二卷三十二門爲王氏原
本尙缺第五一卷元汪氏誠意堂刻五十五卷七十
二門已非其舊此本分二十卷六十六門又與汪刻

不同劉批本刻較後不如十一行本精

明刻山谷外集注十七卷 一函四冊

宋青神史容注翁學士藏本卷末朱筆記云乾隆三十七年二月看史注外集起至十一月廿六日始看一遍訖雪中記又云乾隆四十年五月十四日重校一遍至廿六日校訖青棠書屋記又云乾隆五十二年九月廿五日至三十日校一遍訖鉛山舟中記又云乾隆五十四年五月十日贛州使院翠玉樓前軒校一遍訖第三冊面葉墨筆記云巳酉午日晨起校此冊是日贛郡科試生員榜出文字視吉安郡爲稍勝也翠玉樓南軒記前有提督江西學政關防蓋其視學章門時所鈐也上下方校語朱墨爛然後補錄淳祐庚戌容孫季溫跋亦蘇齋筆每冊有錢孝修圖

書印孝修原名興祖東澗翁之子亦好藏書

附藏印

虞山錢純孝修氏原名興祖

翁印方綱 祕閣校理 翁引達 蘇孫過眼

葉志詵 東卿過眼

宋刻淮海居士長短句三卷 一函一冊

每半葉十行行二十一字驚字和字缺筆北宋刊也
舊爲朱臥庵藏書宋刻僅存上卷及中卷之二葉四
葉餘皆臥庵鈔補明吳文定文壽承周天球皆有藏
印 國朝道光閒由士禮居入虞山張氏其面葉題
字蕘翁手筆也後有蕘翁兩跋及蔣辛峰因培跋辛
峰亦常熟人嘉慶閒官泰安令著有烏目山房詩存
庚戌九月中澣復生孫雲鴻觀

道光乙未秋八月十一日訪芙川仁兄於味經書
屋得觀此朱臥庵補鈔宋刻淮海詞以識心賞辛
峰蔣因培

嘉慶庚午人日書友以社壇吳氏所藏諸本求售
中惟淮海居士長短句最佳因目錄及上卷與中
卷之二葉四葉猶宋刻也余所見淮海集宋刻全
本行款不同無長短句蓋非一刻而所藏有殘宋
本行款正同內有錯入淮海閒居文集序第三葉
與此目錄後所列序中三葉文理正同知全集或
有長短句本也惜此已鈔補然出朱臥庵家舊藏
必有所本矣買成之日復翁記

此冊不止長短句之可寶也前目錄後有淮海閒
居文集序四葉尤爲可寶此全集之序偶未散失

附此以存俾考文集顛末後來翻刻鈔傳之本俱
無有矣勿忽視之道光元年四月重檢并記堯夫
附藏印

原博

雁門世家 壽承

周印天球

應禎

臥庵居士 寒士精神 休寧朱之赤珍藏圖書

臥庵老人

虞山張蓉鏡鑑藏 芙川鐫定 蓉鏡

陳延恩觀

風月從橫玉簫中

舊鈔本寶晉山林集拾遺八卷 四冊

宋米芾撰芾所著山林集百卷亡於南渡紹定壬辰
岳倦翁重爲編輯今四庫本八卷題曰寶晉英光
集卽岳本而有所附益者也此本芾孫憲所輯嘉泰
改元刻於筠陽郡齋卷一賦卷二詩卷三長短句卷
四文卷五寶章待訪錄卷六書史卷七畫史卷八硯
史嘉泰元年下距紹定壬辰二十八年則其本尙在
倦翁前矣米集存於今者當以此爲第一集中遇相
字貞瑤等字皆缺筆則猶從宋本傳錄并錄南畝外
史跋云南宮山林集嘗見鈔本六十卷茲孫憲所刻
拾遺爾嘉靖乙酉豐道生觀於錫山華中甫眞賞齋
六十卷本雖非全帙已過其半明時中葉尙有流傳
則珠光劍氣當有神物護持安知不重出於世耶汲
古閣毛氏百歲堂惠氏皆有藏印

附藏印

毛晉之印 汲古閣 毛氏子晉 毛晉私印

子晉

汲古主人 毛扆之印 斧季

惠棟之印 定字

席鑑之印 席氏玉韶 黃山珍本

涂水喬氏鶴儕藏書印 鶴儕

宋刻竹友集十卷 一函三冊

宋謝薖撰薖字幼槃其兄逸字無逸著溪堂集兄弟並以詩名文集合三十卷紹興辛未知撫州事趙士鵬刻之學宮前有苗昌言序及呂本中題詞序後列校刊姓氏曰右從事郎軍事推官宋砥曰右文林郎軍事判官陸昱曰左迪功郎差充州學教授苗昌言

曰右中散大夫通判軍州主管學事嚴仲遠曰右朝
議大夫知撫州軍州主管學事兼管內勸農營田使
趙士鵬宋諱缺筆遇構字則曰御名每半葉十行行
二十八字楊星吾得之日本人向山黃村前有錢長
祚珍賞印按此集刻本久佚 四庫著錄者明謝肇
淛從文淵閣傳鈔常熟瞿氏亦有鈔本校刊姓氏之
後有一行云淳熙二年十二月陽夏趙煌重修則世
閒所有鈔本皆自重修本出此本未經修改楮墨精
良宋槧上乘也

此宋槧謝邁竹友集十卷鐫刻精良紙墨朗潤宋
槧之絕佳者 四庫提要云今所行本只四卷又
有詩無文其所著錄之十卷本乃明謝肇淛從內
府鈔出然傳鈔者仍希故百年來著錄家仍不見

邁集若宋槧原本則自明內府外無著錄者然則此本爲天壤閒孤本已數百年無論今日也初爲日本向山黃村所藏余以爲宜重刊以廣其傳因借得用西法影撫之未幾余將歸黃村好余之刀幣古錢數十事迺議以此原本交易之邁與兄逸同列江西詩派中據苗昌言跋此集得之於其子敏行卽其所編次又稱二謝交游徧天下旣沒之後爲之傳序哀詞祭文者甚眾今未暇博詢而徧錄也特取呂舍人之所書摹其真蹟於後夫以邁之文行烜赫一世生平酬應之作當不下數十冊此集名爲十卷其實詩不過二百六十二首文不過二十五首並其傳序哀詞祭文不載其編次之謹嚴可謂不誣其先則昌言稱敏行之詩律有典

刑者亦爲寶錄今人名不出里閭身前列集卷端
題詞連篇累牘轉瞬化爲煙雲讀此集知古人篤
實所以傳世愈遠也光緒甲申十一月二日宜都
楊守敬記於鄂城通志局客次

附藏印

寶宋閣珍賞 錢長祚珍賞印

漱芳閣 漱芳閣鑒藏印

錢野氏章 子孫世昌

向黃邨珍藏印 海堂藏書

楊星吾日本訪書之記 星吾海外訪得祕笈

宋刻殘本梁溪集三十五卷 一函二十冊

宋李忠定公撰原本一百八十卷此本存者卷十三
十四卷四十一至五十二卷六十二至七十卷九十

一至九十五卷九十七卷一百卷百四十三卷百四十八卷百六十一至百六十三凡三十五卷黃蕘翁跋以爲三十八卷誤也每半葉九行行二十字清明悅目與監本算經同一精妙卷端有錫山安國寶藏朱記安國卽刻初學記者所謂安民泰是也竺塢文氏汲古毛氏皆有藏印乾隆間有嘉定李枚者忠定二十六世孫也其家舊藏是集兵燹散失訪之數十年得於高陽相國家其後入郡中黃氏汪氏又由沈韻初家歸於滂喜齋

枚自髫齡就傅時家嚴天申公諱令德於課文之暇備述始祖忠定公梁溪文集自先大父子珮公諱士達入嘉定縣庠館於鰲城時遭兵燹是集遂失去枚竊聞之以始祖之豐功偉烈爲宋代名臣

其箋奏劄議詩文之屬不得仰窺其全深爲清歎
越二十年枚年甫三十供奉內廷時與名公鉅卿
及海內藏書諸名儒訪梁溪文集音耗竟無所聞
也越二十餘年至雍正己酉下榻於衍聖公之九
如堂見其牙籤玉軸充棟盈車詢之守者知梁溪
文集爲舊族高陽相公持去高陽諱爵 聖祖時
甌卜者也又越十餘年枚抑鬱無聊厯游幕府過
上谷所屬之地道經高陽府第半屬荒基徐叩之
而是集猶在乃求其發篋拜觀實爲宋代鐫板鴻
文偉議捧讀難竟因以厯歲所餘館穀傾囊與之
而是集始得返趙嗟乎梁溪文集吾家故物也越
百年而無恙物之來歸亦有定數云乃詳述之以
示後之子孫乾隆六年歲在辛酉四月朔日二十

六世孫枚謹識

李綱梁溪集一百八十卷述古堂書目載其名全集世不多有何論宋刻惟此宋刻殘本始十三終一百六十三當是一百八十卷之舊而闕存三十八卷者先是遭俗子割補卷第取卷中文字有數目者每卷填改鈐以圖記掩蓋其痕余悉按舊鈔本更正而以數目字還其原處有失去者仍以素紙空其格可謂愼之至矣此書購自東城故家價止數金今茲裝池復用二十金惟恐後人以殘闕視之而不甚寶貴故於其裝成之日著其顛末如此嘉慶甲子六月二十日堯翁黃丕烈識

附藏印

文印徵明

膠陽安氏珍玩 錫山安國寶藏

學士之章

汲古閣圖書記 虞山毛氏汲古閣收藏 毛鳳

苞印 臣晉 東吳毛晉 子晉氏 毛表 毛

表之印 毛表奏叔 毛奏叔氏 東吳毛表

奏叔氏

二十六世孫名枚字卜功一字藕塘圖書

堯圃 黃丕烈印 汪士鍾藏

明刻劉屏山集二十卷 一函四冊

宋劉文靖公撰朱子之師也前後有朱子跋附以論

議墓志明華亭董氏山陰祁氏 國朝曹棟亭蕭靜

君皆有藏印祁氏蕭氏各有藏書銘以朱文方印鈐

於卷首祁氏銘曰澹生堂中儲經籍主人手校無朝

夕讀之欣然忘飲食典衣市書恆不給後人但念阿翁癖子孫益之守勿失曠翁銘蕭氏銘曰名山草堂蕭然獨居門無車馬室有圖書沈酣枕藉不知其餘俯仰今昔樂且晏如蕭寥亭銘

附藏印

董印其昌 玄賞齋

澹生堂藏書記 曠翁手識 山陰祁氏藏書之

章 子孫永珍

蕭印夢松 靜君 蕭寥亭四世家藏圖籍

以身守之罔敢失墜

棟亭曹氏藏書

長白敷槎氏堇齋昌齡圖書印

朱刻殘本歸愚集九卷 一函四冊

宋葛立方撰原本二十卷見國史經籍志此存卷五至十三共九卷每半葉十二行行二十二字楷墨精雅宋刻中之上駟也舊爲士禮居藏書前有阮亭竹垞題識蕘翁從別一鈔本影寫鈔本多樂府一卷今歸而宋樓矣蕘翁跋鈔本三則已刻入士禮居題跋記此本二則未刻因錄於後又案蕘翁謂著錄家作十卷誤於阮亭居易錄此實不然阮亭題識明言已佚其半矣豈有誤耶

乾隆甲寅夏仲從東城顧氏得殘宋本侍郎葛公歸愚集一束係未經裝池者始猶不甚貴重特因宋刻故儲之耳後於海鹽家椒升處見一舊鈔本首尾悉同中多樂府一卷但書卷第不標數目前有王阮亭朱竹垞題識知前人已重爲祕本然余

不能無疑焉歸愚集本二十卷近時撰集書目作
十卷其誤實始於阮亭居易錄卷十六有云宋葛
立方常之歸愚集十卷詩四卷樂府一卷騷賦雜
文一卷外制二卷表啟二
卷諡文康勝仲之子諡文定郊之父也國史經籍
志作二十卷文定公南渡賢相有文集二百卷詞
業五十卷不知傳於世否是阮亭所據以爲十卷
者卽此鈔本之數中有樂府一卷不知從何補入
若宋刻僅有五卷至十三卷律詩四卷賦騷銘文
一卷外制二卷表啟二卷統計之僅有九卷無所
謂樂府一卷也茲幸有宋刻可據足證十卷之誤
不則阮亭爲 本朝大儒所言豈無足據孰知其
貽誤後人有非淺鮮者乎余故樂爲宋刻重裝之
而影寫阮亭竹垞題識并於卷首竊附數語於尾

以傳信於後云十一月冬至前三日小千頃堂主人黃丕烈書

嘉慶三年歲在戊午初秋陶五柳主人復以舊鈔本歸余宋刻舊鈔並藏讀未見齋眞兩美之合也
蕘圃氏又識

侍郎名立方謚文定郊之父也按經籍志歸愚集二十卷此佚其半矣文定公南渡賢相有集二百卷詞業五十卷不知傳於世否當訪之濟南王士禎書

竹垞娛老齋成展讀一過時康熙丁丑八月二日附藏印

士禮居 丕烈 蕘夫

汪氏士鐘 閩源眞賞

鈔本翠微南征錄 一冊

宋華岳撰翠微其號也岳以劾韓侂冑蘇師旦流竄建甯此本劾侂冑疏卽附其後岳又有北征集 四庫所未收傳本更稀也冊首題字云咸豐庚申九秋購於揚州仙女廟鎮似許信臣中丞筆

宋刻友林乙橐一卷 一冊一冊

宋史彌甯撰彌甯丞相浩之從子嘉定中知邵陽此本前序脫去一葉序中自稱其名曰域厲樊榭云集有鄭中卿惠蛸蟀詩文獻通考鄭域字中卿當卽其人也案序言在湘南幕下掇拾詩橐得百七十首命工鈐之是嘉定閒邵陽刊本也每半葉八行行十六字字體瘦勁古香古色撲人眉宇舊藏椒花吟舫後有少河山人跋笥河先生之子也

附藏印

大興朱氏竹君藏書印 朱筠之印 菜花吟舫

朱印錫庚 少河

葉名澧 潤臣借讀

同繇私印

宋刻殘本後村先生詩集大全十一卷 一函四冊

宋劉克莊撰華林劉帝與編集後村文集有五十卷
本有六十卷本天一范氏有大全集一百九十六卷
視墓志所稱二百卷者僅缺四卷當爲最完之本此
本分類編集原十五卷又佚去自五至八四卷據錢
天樹手跋則大全集之一種也明天籟閣項氏 國
朝林吉人季振宜席玉照黃蕘圃張芙川皆有藏印
第一冊後有芙初女史絕句四首外面函簽則常熟蔣

伯生筆芙初卽芙川之室故其所用印記曰雙芙閣
又有桐城方若衡題字當時虞山閨媛多好翰墨蔣
氏刻法苑珠林其後捐資姓氏一一可證也

乾隆甲寅長至後五日王芑孫觀

芑孫

後村先生分類詩集各家書目俱未之載是本原
爲項子京天籟閣故物後爲延令李氏所藏卽滄
葦書目所載宋刊劉後村集二本是也林吉人席
玉照俱有印記今由百宋一廬歸小琅嬛清祕聚
散無常撫卷慨然記之以詩

一襟哀郢淚辛酸詩思分明樂去官無人可論南
園事留得丹心與後看 詞華哲匠蒙天獎敕語
珠璣冠簡端編集獨開分類格古香猶是宋雕刊
墨林萬卷劫灰飛古本流傳此絕希八十詩翁

高格調伊川擊壤想依稀 潑茗薰香繡嬾拈芸

編珍重展瑤籤好花明月原無主自取猩紅小印

鈐道光戊子二月花朝琴川女士姚晚真笑初氏

題跋時年二十六歲清寒淒雨病榻淹纏腕弱字

劣不計工拙也無虛佳日而已姚氏笑初氏女史

道光庚寅上巳桐城女士方若蘅叔芷氏假讀於

鏡清閣時盆梅尚未全落靜對古編覺幽香與墨

香同耐人尋味也燒燭漫誌晚芳女士

宋刊劉後村分類大全集詩十五卷雖有缺卷缺

頁而古香可愛世所罕見復有項子京季滄葦林

吉人席玉照諸藏書家印記黃蘗圖裝背於殘損

之餘今芙川張君得而珍弄之予按後村墓誌言

著前後續新四集二百卷隱居通議謂後村卒後

其家舊萃其生平所著別刊少本爲大全集所謂別刊少本此書當亦在中大全則先有其名也後村詩步趨誠齋放翁年八十冥搜不倦但才力未逮耳和居厚弟壽詩云符輩安能刻且編可憐辛苦事雕鐫贈錢道人云一般難曉處裝背貴人詩茲乃卽其所刊書裝背於五百年之後而我輩猶得披吟後村有知不當發大噓於九泉下邪時在道光十年七月七日跋於南郊之拜詩閣單學傳印

單學

海虞老

傳印

秀才

道光乙未七月中浣六日合江陶廷杰觀三復

廷杰

蓮生

道光戊子新正張君芙川招集小琅嬛福地酒後出所藏宋本後村分類詩見眎摩挲古澤不能自

休惟行閒已有朱墨塗點處意甚惜之及觀第三
卷改敕詔爲敕設乃知閱者固是有學之人轉惜
其於全書魚豕未盡勘正也好古者誠當相賞於
驪黃以外哉充有邵淵耀記淵耀壽樂堂印

道光癸巳端陽前一日錢天樹拜讀嘉仲

此係大全集中一種月霄從四明范氏所鈔大全
集與此微有不同豈宋時已有兩本邪雖略有闕
葉眞不易得之祕笈也芙川先生從琴川郵寄因
得拜觀以志眼福天樹又記天樹印信

後村集文勝於詩然詩亦有新雋不可到處在讀
者分別求之耳世所傳本多六十卷張月霄從天
一閣鈔得一百九十六卷爲後村大全集此集當
是全集集中分類錄出僅十五卷而五六七八卷已

關第十五卷亦未全然古香溢於楮墨零璣碎璧

彌足珍也心青居士孫原湘記

孫印

心青

香瓣西山憶盛年獨篋湯液苦熬煎南園一記應同憾八十詩人老更顛心青記後又題

後村集五十卷爲林秀發編次者予向曾蓄其餘舊鈔皆如是雖講習堂鈔本亦不外是知五十卷之傳世久矣惟予訪書華陽橋顧氏乃見有六十卷本與五十卷有雙夾綫單夾綫之別卽如詩話詩餘並不在現有刊本敘次蓋後人得宋刻殘零版片任意排比故六十卷中記敘等類往往羨於五十卷本知後人就勵存者編卷彼此有不同也予曾據此以補五十卷而其書今存藝芸書屋其華陽本予介歸禾中金轡庭玩華居今主人不在

此書之存亡亦未可定近日常熟張月霄愛日精廬藏書志有後村大全集一百九十六卷鈔本從天一閣舊鈔本影寫是世間希有之本係錢塘何夢華爲阮宮保訪求遺書備四庫所用故搜羅及此而爲月霄錄其副也此殘宋精槧可云未見書標題後村先生詩集大全共十五卷爲華林劉帝與編集并分類而每類又分體雖目錄與本書皆有殘闕然自五六七八卷外其卷一至卷十五猶可略見一斑誠奇書也棄置篋中久矣茲倩老友胡茂賡手裝治之居然斷珪殘璧古香襲人他日顏賦之成亦可分一席也歟卷首有殘序一葉似出御製圖書花押古色嫋嫋字跡亦屬眞本臨摹以予所見江湖小集序跋等出於名人眞跡者

無不神采飛動觀此益徵宋刻之可寶後人嗜古
動欲求全予敢問之開蒙讀大學亦知有亡篇乎
何不害爲萬古經書也書此喚醒其夢夢道光乙
酉立秋荷華生日宋屋一翁識

附藏印

宋刊奇書 方印甚古

百忍垂型 鷺峰

項子京氏家藏 項子京鑒定 項氏家藏 墨

林祕玩 項墨林父祕笈之印 項元汴印 子

京氏 眞宋刊

振宜珍藏 振宜 滄輦

林佶 鹿原

席氏玉照

子嘉 天樹印信

芭孫

蕘翁 黃丕烈印

虞山張蓉鏡鑒定宋刻善本 虞山張蓉鏡鑒藏

蓉鏡 雙清 小琅嬛福地 小琅嬛福地張

氏藏

琴川張氏 芙初 雙芙閣 芙初女史姚晚眞

印 一植心勤是讀書

方氏若蘅曾觀 晚芳女史 勤襄公五女

田居放叟曾觀

陳鑾 芝楣曾觀

佛桑仙館

影宋鈔棠湖宮詞不分卷 一冊

汲古閣影宋鈔本後有木圖記云臨安府棚北大街
陳宅書籍鋪印行所謂書棚本也按蕘翁跋云何夢
華示余毛氏宋本板心第曰棠湖一棠湖二不標宮
詞疑宋刻全集中一種此板心添入宮詞字非其舊
矣攷倦翁玉楮集八卷絳雲樓述古堂皆著錄此本
前有小序云比因棠湖編鈞之暇成一百首以示黍
離宗周之末忘則棠湖二字專爲宮詞而設甚明非
全集之一也汲古祕本書目有宋板岳倦翁宮詞與
石屏詞許棐梅屋詞合爲一函當卽蕘翁所見本

附藏印

毛晉之印 毛氏子晉

士禮居藏 平江黃氏圖書

明刻剡源集 四冊

剡源集明有二本一洪武初刻二十八卷一萬曆間戴洵刻三十卷何義門又見一舊鈔本四卷文六十五篇是爲最初之本此本詩六卷係槧本紙墨不古當在明中葉以後文二冊係鈔本不分卷內有朱筆校字其遜齋銘蘭石贊萬秀才入道疏孫叔和墓誌銘及講義五首朱筆識其下云集內無則必與通行本異矣惜無序目鈔本刻本是一是二或全或缺皆不得而知之矣舊爲查映山太史藏書

附藏印

程萬 葉氏藏書

竹南藏書 聽雨樓查氏有圻珍賞圖書

龍山查氏珍藏書帖印記 賜硯堂圖書記

查映山太史藏書

元刻趙松雪文集十二卷外集一卷 一函二冊

元趙孟頫撰集十卷附行狀諡文一卷目錄一卷合
十二卷後至元己卯花谿沈璜校刊外集何貞立序
亦題後至元己卯則同時刻也按璜跋云松雪翁平
生所爲詩文未鏤板今從公子仲穆假全集與友原
誠鄭君校正鋟梓則趙集當以此爲第一祖本字體
圓勁亦仿松雪翁述古錢氏所收卽此本而敏求記
云乙丑中秋購得松雪翁尙書集注序眞蹟此不收
知公之詩文遺佚者多矣今按書序此刻在第六卷
中則錢氏攷之殆未審邪抑其所見書序爲別一篇
邪

附藏印

司馬氏

衛印尹東

衛印洪倫

衛合協鼎粉

寶

寶古堂

董氏體仁

句曲山樵

蒲汀

孫印承澤

元刻楚國文憲公雪樓程先生文集三十卷

十六冊

元程鉅夫撰舊爲四十五卷子大本輯錄門生揭傒斯校正其孫世京重編爲三十卷卽此本也前有年譜一卷亦世京編附錄一卷則行狀碑銘之屬也明文休承手跋曰嘉靖庚申五月向秦汝立處攜歸留几上月餘草草傳鈔副冊還甌感誌汝立博雅好古留心口書必能寶此也八月廿三日茂苑文嘉識休承在明中葉而卽詫爲奇祕則其書洵可寶矣又有

倪鴻寶藏印 國朝虛舟王氏五研袁氏芙川張氏
皆經收藏黃堯圃亦有題字冊首篆書十三字曰元
初槧雪樓先生詩文集三十卷陳蓮史筆也蓮史又
以隸書跋其後云洪武閒亦有刊本是則元時初刊
竊謂不然此書常熟瞿氏歸安陸氏皆藏明刻本有
彭從吉序云程文憲公集三十卷癸卯歲刻於建陽
市僅成前十卷其後廿卷未刻又其曾孫潛跋云後
二十卷寫而未刻洪武辛未刻於朱氏之肆以此證
之則元時所刻僅前十卷第十一卷以後皆明時續
刻也前人所謂元刻明刻實卽一本蓮史謂有二刻
誤矣陸氏著錄一明刻本一影元鈔本而所謂影元
本者仍有明洪武中諸序矛盾極矣

王璠

鴻寶 元璐

稽璜曾觀 王澍 翁印方綱 覃谿 堯圃

蓉鏡 芙川鑒定 曾在張蓉鏡家 芙川張蓉

鏡心賞 虞山張蓉鏡鑒藏

汪士鍾字春霆號明園書畫印

涂水喬氏鶴儕藏書印

明刻道園學古錄五十卷

十冊

自卷一至二十爲在朝槩卷二十一至二十六爲應
制槩卷二十七至四十四爲歸田槩後六卷爲方外
槩與 四庫著錄合明人覆元本也

附藏印

海琛 支郎琛誌

元刻黃文獻公集二十三卷 八冊

元黃潛撰卷一至三曰初稟卷四至十曰續稟上題臨川危素編卷十一至十六曰續稟中題門人王禕編卷十七至二十三曰續稟下題門人宋濂傅藻同編文獻歿後五年金華縣令胡惟信所刻據濂序二十五卷而集止二十三卷目同蓋五字誤耳文獻集元時有二本一卽此刻一名金華黃先生文集文獻在時貢師泰刻於三山學官卽錢曉徵跋所謂三十卷本也前有明善堂覽書畫印記安樂堂藏書記明刻薩天錫詩集

薩雁門集元刊八卷汲古閣刻三卷附集外詩一卷卽四庫著錄本也此本分體不分卷按絳雲樓書目有薩天錫前後集雁門集所謂雁門集者當卽八

卷本前後集卽此本也此本板心標前一訖前五十一是爲前集前集之後又自一起至八十五空白不標後字當爲後集明成化二十一年兗州知府趙蘭刻之宏治十六年東昌知府李舉再刻此宏治本也前有劉子鍾趙蘭李舉三序

附藏印

口葉齋 何石友家藏圖書

明刻存復齋集十卷附錄一卷 一面六冊

元朱德潤撰曾孫夏重編項璠校刊後有順治丙申蔣玠手跋玠字綱臣亦吾郡人又劉燕庭方伯題云嘉慶庚辰臘日得此本於都門隆福寺三槐堂書肆首葉有師竹齋印記師竹齋李墨莊藏書處也東武劉喜海誌簡首成化十一年項璠刊本九字亦燕庭

所書

元人朱澤民常熟人善畫著文集十卷每以畫事掩其長延祐初薦爲提舉教授挂冠歸年七十二卒初澤民祖祕書卜葬地祖母夢一衣冠偉丈夫告云勿奪吾宅吾且爲夫人孫明日掘地得小石碑刻曰太守陸續之墓傍刻云此石爛人來換石果斷祕書隨掩之而更卜焉夫人又夢偉丈夫來謝云吾眞得爲夫人孫矣是夜澤民生焉澤民子吉徙居崑山國朝爲給事中高皇帝旌其直言立孫文成化甲辰進士監察御史文子希周宏治丙辰狀元後身事見虞伯生跋子孫科第見李文正續集順治丙申春王燈夜蔣玠識

附藏印

網臣珍藏圖書 蔣玠

師竹齋圖書

喜海 吉甫 嘉蔭移藏書印

元刻潛谿集十卷附錄二卷 一面二冊

宋濂撰前有陳旅序後有王禕序濂集 四庫著錄
者三十六卷明正德刻本日鑾坡集曰翰苑集曰芝
園集曰朝京彙合七十四卷天順刊本二十六卷題
宋學士先生全集又一本十八卷題潛谿集亦天順
刻此本十卷附錄二卷附錄之後有至正丙申門人
鄭煥跋謂兄仲舒所編定而煥又益之者也仲舒昆
弟卽世所稱義門鄭氏家有麟谿集者是也標目前
第一行題曰潛谿前集首篇國朝名臣序頌自忠武
王木華黎至劉文靖公因凡二十二人稱元日皇元

三
提行頂格蓋猶未入明時所刊潛谿集莫先於此亦
莫可寶貴於此矣明內閣遺書外函如一封書式不
用摺疊文淵舊裝也

明刻潛谿集十八卷附錄一卷

入冊

題弋陽黃溥選編按附錄中有溥祭文題景泰七年
三月是年丙子明年丁丑英宗復辟改元天順是亦
天順閒刊本也前有陳旅王禕歐陽玄三序

鈔本說學齋彙

二冊

危太樸集五十卷見焦氏經籍志此本不分卷前一
冊後有歸震川跋云前三十年從吳純甫借觀今問
其家其半軼矣命童子錄而存之後一冊有葉文莊
孫恭煥跋云嘉靖辛酉震川師從予覓太樸文不得
自隆慶丁卯後乃獲此卷實先文莊鈔存師已仙去

不獲見可感也以此二跋證之震川初見全帙及傳錄時已失其半其跋作於嘉靖三十八年下距辛酉實二年耳既假錄之又搜訪之太僕之於是集可謂勤矣又云紙尾暗記所作年歲此本前帙甲子注於每篇之下而後一冊不然則是前半從吳純甫本出而後半足以葉本也舊藏文瑞樓金氏知不足齋鮑氏

危太樸集二冊去年客吳郡得之金星韜家麗煌三兄見而愛之今年三月麗煌有聊城之游無以爲贖因舉此書及宋紙舊鈔高注國策一部爲贈二書俱不易得舟中客邸宜加意保護勿爲蟲鼠風雨所壞俟明年攜歸更從君借觀展卷定爲之欣然也乾隆丙子三月廿二日棘人鮑廷博識

附戴印

結社溪山 文瑞樓 金星韜藏書記

明刻蘇平仲文集十六卷

八冊

明蘇伯衡撰劉基宋濂序後有處州推官黎諒跋云
林公與直編類錢板郡庠傳世既久朽失過半諒命
郡人葉景森繕寫壽梓壬戌秋八月成書壬戌正統
七年也平仲與宋濂同郡濂推服其文鄭氏麟溪集
所載如師儉訓鄭仲河傳貞孝處士畫像贊書鄭叔
恭字解後皆平仲作此集惟有師儉訓一首則知其
文散佚者多矣然集中如鄭氏三老圖贊鄭叔文字
序跋黃侍講送鄭仲舒序亦爲義門掌故而麟溪遺
之則又可以補其闕也有璜川吳氏收藏印
舊鈔本王常宗集四卷補遺一卷續補遺一卷

明王彞撰彞嘉定人洪武初預修元史自號鵷雉子
其集四卷補遺一卷皆都穆編嘉定劉子珍刻此卽
從刻本傳鈔也前有穆序後有浦杲及子珍跋續補
遺文三首詩三首則陸嘉穎得自項藥師家舊爲張
美川藏書冊首題云此本川筆古雅極似錢求赤先
生所書細審裝治爲述古堂故物遂以重值購得亦
別集中罕見之祕冊也嘉慶乙卯中秋後十日虞陽
張蓉鏡識

附藏印

蓉鏡 虞山張氏 小琅嬛福地祕笈 曾在張

蓉鏡處

鶴齋

明刻缶鳴集十二卷 一函四冊

明高啟撰周立公禮編青邱之妻姪也舊爲虞山張
芙川藏書黃琴六跋云明永樂元年周立所刻正統
未燬於火甫里周仲英重刻吳文定爲之序卽此本
是也吳序失惟存謝徵一序按徵序云季迪之詩有
吹臺集缶鳴集江館集鳳臺集今取諸詩刪改爲之
總題曰缶鳴集詩九百首皆其精選是此編爲青邱
子手定本今所行大全集景泰中徐庸編刻詩雖倍
之非其傳矣明竺塢文氏國朝蔣文肅汪東山馮
二癡曹彬侯趙秋谷皆有收藏鑒定印其臣伊一印
則文肅公尊人也其首冊附裝琴六與芙川書乞借
皇山人手鈔續談助其書後歸士禮居今藏虞山瞿
氏完好無恙據士禮題跋謝徵序外尙有胡王二序
又有公禮後序今皆脫之

附藏印

文休承氏

臣班 二癡

譙國 曹炎 彬侯

太史氏 古縉雲氏 甲戌進士 秋谷趙執信

氏

汪繹別字東山 庚辰狀元

稽璜曾觀

琴六借觀

蓉鏡 芙川 蘿蔭亭長 清河伯子 小琅嬛

福地 小琅嬛福地祕笈 小琅嬛清祕張氏收

藏 張蓉鏡 蓉鏡珍藏

方氏若蘅曾觀

陳鑾曾觀 芝桐借觀

喬印松年 鶴儕

明刻龍溪陳先生文集五卷 二冊

明陳睢子晦撰 四庫不著錄後有鄭雍序子晦閩之龍溪人年十六卽領鄉貢後爲教官初任建昌南城後調常州升國子學正卒於官年四十有一其文多在常州時作談毘陵典實者頗有資於考證也舊藏虞山張氏後有陳蓮史跋云道光乙巳三月向芙川兄借讀并傳寫一部珍藏張冰圓題其首云此爲瞿忠宣金元功藏書文瑞樓書目所載也雖是明初人別集傳本絕少已酉九月孫鎮軍雲鴻見之因是龍溪文獻欲以善價求之未許也咸豐壬子冬月

附藏印

瞿印式耜 知白氏

金元功藏書記

張氏圖籍 張金吾藏 得者須愛護

虞山張氏 曾在張蓉鏡家 在處有神物護持

清河伯子 笑川張蓉鏡心賞

味經 顧蕓

松年 鶴儕

明刻于肅愍集八卷附錄一卷 四冊

明于謙撰成化元年謙 子上疏訟寃得祭墓立祠

弘治初又上疏請諡予諡肅愍其後改諡忠肅此本

嘉靖丁亥刻題于肅愍集猶未改諡前刊本也前有

河南山西道監察御史簡霄序板心有大梁書院刻

五字附錄遞有增益與目不符 四庫著錄者已改

證本除奏議十卷附錄一卷僅存詩文各一卷非其全帙矣

附藏印

長白敷槎氏堇齋昌齡圖書印

日本刻徂徠集

二十冊

日本物茂卿著東方言樸學者自茂卿始其人在正德享保閒我朝雍正時也七經孟子考文序卽其所作論文直追秦漢韓柳以下皆遭掎擊亦人傑矣哉然獨傾心於明之王李則不可解也文七卷詩二十三卷合三十卷補遺詩十九首序之者滕忠統亦彼國人也

高麗活字本桂苑筆耕三十卷

四冊

崔致遠撰致遠新羅人唐末入中國舉進士第爲高

駢掌書記東方之有文章自致遠始此本豐山洪奭周以家藏本屬湖南觀察使徐有渠用活字排印

高麗活字本蘭溪遺藁一卷

一冊

高麗朴堧撰堧初名然字坦夫明洪武十一年生永樂辛卯登同進士第仕至藝文館大提學精於鐘律與高麗莊憲王同定雅樂集中有疏三十九篇皆論樂之作也前有金祖淳序後有金魯敬跋洪啟禧證狀稱爲海東一夔云

石洲集殘本六卷

二冊

高麗權輶著首二卷佚卷三五言律卷四七言律卷五排律卷六卷七絕句卷八雜體不題姓氏惟每冊首行有墨筆書永嘉後人權輶汝章甫著凡十字亦不知誰所記也攷權爲高麗士族明成祖賢妃權氏

卽高麗人其父永均曾受封爲光祿卿舊爲烏程張秋水藏書

此前明高麗人權輶所著爲朱竹垞明詩綜屬樊榭明詩紀事所不載余於嘉慶丁卯七月買於揚州新城之南柳巷雖缺首二卷可寶也暇日或取明史攷之其事實當有可證烏程張鑑識

余向見嚴久能所藏七經孟子攷文系日本國裝訂原冊其紙色面葉絲綫約略如是非中土所能也道光甲辰春日貞疾居士鑑重展識時年七十有七

高麗刻海居齋集三卷 一冊

題豐山洪顯周世叔前有伯仲兩序卽爽周吉周也詩分四編前編爲東嘉十景詩附詩四十首父母兩

兄和作也其後三卷則皆顯周詩矣顯周尙朝鮮王女封永明尉

竹西詩集一卷

朝鮮女子朴氏撰咸豐辛亥徐惇輔序有云不育早逝則其人在道光閒矣詩雖不工然海東閨閣從未

有以詩名者則不得不以希見珍也

貢草園集一卷 一冊

安南王子緜寤撰倉山先生剛定弟緜采仲藏緜惺仲悟緜窺仲玉校刊前有新安郡公詩五首緜采作皆有緜審序據張廣溪集緜審撰序其印文曰倉山則倉山先生卽緜審也緜寤字仲貽封廣澤郡公王之四十七子攷緜寤詩序云蒼舒竟天猶未滿乎立年緜采詩序云管輅傷心有才無壽則兩人皆不永

年矣案說文親玉也廣雅賑貯也或作窟字書崔息井切悟也名親者字玉名窟者字貯名崔者字悟皆合古義孰謂越裳氏無人哉

張廣溪學文餘集四卷 一冊

安南張登桂撰亦縣審所編輯也質直似擊壤集其讀越史應制一首述越世系極爲詳盡其自序有云南北圻兩次銜命偶有題詠從者鈔寫北圻在諒山南自法越交訌王師出援置臣僨事遂淪戎索兵連禍結至今不解讀此爲之三歎

明刻古文苑二十一卷 二冊十冊

宋章樵注此書常熟瞿氏有宋本揚雄蜀都賦迎春送冬明刻冬作臘孫叔敖碑野無螟螣注螣卽螟螣接爾雅食苗心螟食葉螣螣爲貨螣之誤明刻作

咸蟻尤謬此本冬字正作臘似蟻字正作鹹蟻其爲
明刻無疑宋本遇諱皆缺筆此亦不闕惟字裏行間
尙有古意當是明初覆本余別見一明刻則字畫方
整與今本相伯仲矣

附藏印

古欽鮑氏覺生藏書印 清譽堂

宋刻殘本文苑英華纂要六十一卷辨證八卷

四兩

十五冊

纂要高似孫編辨證彭叔夏撰二人皆聞緒論於周
益公因成此書絳雲樓書目竟題周必大撰誤也纂
要八十四卷此存卷一至六十一辨證十卷此存卷
一至八每半葉十行行十七字據高似孫纂要自序
爲治使史公刊則辨證亦史所刻也高序作於嘉定

十六年而有嘉泰四年叔夏自序則是辨證先刻而纂要繼刊也張氏愛日精廬藏纂要有延祐甲寅趙杉序因目爲元刻木其實書中避宋諱甚嚴辨證卷首猶題皇宋彭叔夏必非元刻趙序後所增耳黃蕘圖所見藪芸本祇有趙序而無高序遂并不知纂要撰人攷傳是樓目而後知之雖以江鄭堂之博聞亦未能詳也藪芸本斷爛此本筆墨精勁神采奕奕猶是宋刻初印明會通館排字合印本脫誤甚多遠遜原刻矣纂要目後有表章經史之寶及徽國經史之章當是明內府物也兩書又皆有練川黃豫卿志朱記

附藏印

朱復廬鑑賞章 結一廬藏書印

北宋刻殘本王荊公唐百家詩選九卷

五冊

元符戊寅刊板前有章安楊蟠序昡殷匡恒敬驚警
貞勸樹等字訣筆每半葉十行行十八字字體仿歐
陽信本寫槧精美眞北宋原刻也惜自十卷以後皆
佚舊爲郡中黃氏藏書後入藝芸書舍

附藏印

百宋一塵 黃印丕烈 蕘圖

汪印士鐘 閔源眞賞

宋刻殘本萬寶詩山二卷

二冊

莫子偁經眼錄載是書三十八卷書林葉氏廣勤堂
刊每葉三十行行二十三字板廣五寸許高三寸半
此本行款一一相合惟存三十一三十二兩卷爲木
門之松柏類竹類筍類松竹類楓類梧桐類槐類榆

粉類楊柳類柳絮類木類草木類雜木類茱萸類葉
類分門龍雜宋人之免園冊也怡邸舊藏卷端有怡
親王寶邸亭所見則田耕堂藏書也

元刻國朝文類七十卷

四十六冊

蘇天爵編此書元時有二本一翠巖精舍刻密行小
字一西湖書院刻卽此本也每葉二十行行十九字
惜缺四十三至四十五三卷前有至正二年二月江
浙儒學提舉移文詳載刊書本末其略謂至正二年
禮部咨中書省移咨江浙行省委本司副提舉陳登
仕校勘監雕至元四年西湖書院點視內有補嵌委
本院山長方員儒士葉森校修至正元年十一月二
十二日本司提舉王奉政在大都蘇參議家獲見元
編較正所刊第四十一卷內缺下半卷又於目錄及

各卷內較正一百三十餘字前有王理陳旅兩序後有太原王守誠跋

元刻殘本皇元風雅

六冊

元建陽蔣易師文編原書三十卷見千頃堂書目又按擘經室外集云二十七卷八十五家末三卷雜編是並非一家爲一卷此本家自爲編總目旣佚不能得其舊第惟存揭曼碩侯斯揭希韋祐民黃晉卿潛吳正傳師道范德機棹劉聲之漢柳道傳賈盧彥威亘王繼學士熙黃子肅清老薛宗海漢十一家每家前有目錄閒亦附以事實每半葉十行行十八字板心題作者之字雕印頗精絳雲樓書目作八卷當是不全本也又四庫著錄者爲元傅習及孫存吾所編二十四卷二書皆名元風雅皆虞道園序皆以劉

因爲第一是以目錄家往往致誤
宋樓藏書志有傳孫本作前集六卷後集六卷與四庫本又不同
附藏印

周印允元

葛印雲薛 嘯園

元刻麟溪集十二卷

六冊

元浦江鄭氏九世同居一時士大夫皆贈以詩文至正中其家長大和集爲一編共十二卷曰麟溪集其所居之地名曰麟溪也王煒爲之序明吳文定送鄭世靜還浦江詩三百餘年孝義門一朝握手見諸孫君家自有麟溪集底用臨歧索贈言文定在成化時上距元末又百餘年其世澤可謂長矣元明之際金華人上最盛宋濂王煒黃潛蘇伯衡皆其郡人是以

文章特美 四庫不著錄亦一奇書也序後有木圖
記曰崇化余志安刊於勤有堂汲古毛氏愛日張氏
甄芸汪氏皆經收藏

附藏印

斧季 毛辰之印 汲古主人

曾在張月霄處 愛日精廬藏書

曾在汪閏源處

高麗刻豐山世槩六卷 三冊

高麗洪氏家集也洪氏籍安東之豐山其鼻祖之慶
有子名侃字平甫侃八世孫履祥始大顯世爲哲鮮
望族此詩卷一日洪厓公文侃所作也曰文敬公文
卽履祥也曰秋巒公文文敬之子也卷二曰文懿公
文曰貞簡公文卷三曰晦溪公文睡隱公文卷四曰

靖惠公文孝安公文卷五曰文清公文曰通德郎公文曰贈贊成公文卷六曰孝獻公文曰足睡公文曰文敬至足睡凡九世足睡三子曰爽周曰吉周曰顯周此集卽爽周所編

元刻朝野新聲太平樂府九卷 一函四冊

元澹齋楊朝英集鄧子晉序前列作者姓氏八十一人朝英亦在其列按鄧子晉序云酸齋貫公與澹齋游曰我酸則子當澹遂以號之今考卷中有徐甜齋是與二公鼎足而爲三矣舊爲汲古藏書第五卷以前鈔補每半葉十六行行二十八字巾箱密行小字本也澹齋所輯又有陽春白雪亭帚館秦氏刻之

附藏印

元本 毛晉私印 子晉 毛辰之印 斧季

汲古主人

湧喜齋藏書記卷三終

從祖文勤公藏書甲吳下庚申之亂燬於火後所存者燼餘耳然多宋元精槧光緒癸未公奉諱居里時葉鞠裳先生客公所授公弟仲午從祖讀公出示所藏書先生精於目錄之學因記其刊行源流成滂喜齋讀書記二卷及公服闋被徵攜書北上未及訂正也庚寅冬公薨丙申夏公夫人又薨時公嗣子尙幼仲午公以事在吳聞耗馳往則悍奴方鳩集書賈持目議價公杖去之點校遺書已稍稍散失矣後仲午公盡室南歸請讀書記稿本於鞠裳先生增補多則且循天祿琳琅舊例列入藏家掌故改訂三卷易其名曰藏書記而以文勤公署名者從葉先生意也書已付梓矣適爲江陰某君所見卽據所錄而假宋刊某書公婉卻之某君不諒貽書切責遂商諸鞠裳先

生先生謂不如稍緩行世甲子秋公患腹疾及冬彌甚東南戰起力疾赴滬就醫乙丑正月十二日卒曾不數月海上有售滂喜齋藏書記者蓋海寧陳乃乾所印行也卷首一序於文勤後人誣護殊甚吳中士大夫閱之多不平紛來詰責曰文勤兄弟後嗣雖稚然汝族固多人獨無能辨白之乎族人以承厚知此書源委屬請板於從祖母邢淑人述其厓略而印行之王君九表丈深悉公生平行誼因乞爲一序嗚呼仲午公秉心冲淡不求聞達抱經世之學而不欲以著述自顯獨於文勤手澤尤加愛護雖權貴嗔責宵小誹謗有所弗避其克繼兄志爲何如哉又許鶴巢葉鞠裳兩先生皆公之業師也公節衣縮食爲刊其書許氏詩契齋集已先刊矣葉氏奇觚廬文集成於

鞠裳先生身後所售書值盡歸葉氏奉先生蒸嘗焉
師弟之間死生不渝其風義爲何如哉書賈射利不
加省察妄作弁言適足爲通人齒冷而已今公後嗣
髻鬣未能論撰先志厚雖不文安容緘默爰昭告於
公之靈而述之如此戊辰首夏姪孫承厚謹跋